

Arubaanse Padvindsters Gilde ganado Copa Hubenil Gobernador Felipe B. Tromp

ORANJESTAD- Ariba dia di Rey, 27 di april proximo, e miembronan di e grupo di scouting Arubaanse Padvindsters Gilde lo ricibi e copa Hubenil Gobernador Felipe B. Tromp for di man di Gobernador Fredis Refunjol. Tambe Gobernador lo entrega dos premio di estimulo: uno pa e atleta Annelaine Jacobs y otro pa e ciclista Joshua Krozendijk.

E ceremonia lo cuminsa pa 8or y 30 di mainta den Wilhelmina Park.

E miembronan femenino di APG, durante e ultimo aña a traha hopi na nan propio formacion como lidernan hubenil. Fuera di esaki nan ta desplega diferente trabou social den nos comunidad. Por ehempel traha pakete di cuminda y paña pa yuda esnan den necesidad.

Nan ta participa den diferente actividad pa yuda conserva e medio ambiente manera "beach clean up". Anualmente nan ta yuda den Fiesta Rotaria organisa pa Aruba Rotary Club.

E miembronan bou guia di

nan lidernan ta bishita regularmente e casnan pa nos grandinan, aki nan ta combersa y canta cu e grandinan. Di nan banda e grandinan ta conta e hobennan storianan di antes.

Actualmente tin un grupo cu ta colecta cama y diferente mueble pa drecha nan y pone nan den bon condicion pa entrega nan na un famia den necesidad.

E miembronan ta participa activamente den e proyecto di Aruba Doet y e grupo di APG Savaneta ta yuda den tur actividad organisa pa Centro di Bario Savaneta.

APG ta participa tambe na tur actividad protocolar organisa pa Gobierno di Aruba.

E mision di APG ta pa duna guia na hobennan femenino den un forma educativo cu retonan y aventura y tambe siña nan descubri y desaroya nan propio potencial.

Arubaanse Padvindsters Gilde tin 285 miembro, di 4 pa 25 aña, den seis distrito na Aruba, esta San Nicolas, Savaneta, Pos Chikito, Dakota, Santa Cruz y Noord.

APG ta celebra e aña aki su 75 aniversario na Aruba y si mira

atras e miembronan a aporta na comunidad pa medio di participacion, duna ayudo y guia otronan.

Na augustus proximo APG ta organisa un proyecto comunitario patrocina pa e organizacion mundial Worldwide Association of Girl Guides and Girl Scouts. E asociacion aki lo manda seis profesional di Inglatera pa Aruba pa organisa e Gold Program. E programa ta destina pa tur hoben cu ta afilia na un "service club" of organizacion hubenil.

E hoben atleta Annelaine Jacobs lo ricibi un premio di estimulo pa su disciplina den e ramo di deporte logrando asina ganando diferente premio tanto na nivel local como internacional.

Su logronan special tabata ariba tereno di ahedres y hisa peso.

For di edad di 9 aña e ta practica ahedres y a representa Aruba den diferente olimpиаda di Schaak den exterior manera na Alemania, Rusia, Turkia, Noruega. Durante e Carifta Chess Championship 2016 na maart ultimo el a gana medaya di oro den cat-

egoria femenino bou 20.

Pa loke ta weightlifting, Annelaine a gana varios premio den e torneo Himno y Bandera 2016.

Na 2015 el a bira Female Youth Champion pa e campeonato di Rey y a gana prome luga den e Campeonato Nacional.

Annelaine ta practica diferente otro deporte manera dam, atletismo, landamento, ciclismo, triatlon, pero actualmente e ta concentra mas ariba ahedres y weightlifting. E di dos premio di estimulo ta bay pa e hoben ciclista di apenas 12 aña, Joshua Krozendijk.

Joshua a cuminsa practica e deporte di ciclismo na aña 2009. Entre e diferente premionan cu el a gana por mencionan cu na 2015 el a gana e prome luga overall durante e "3 daagse evenement" den categoria di MTB y prome luga den "National Champion". Den categoria di Roadbike tambe el a gana varios premio na nivel di prome luga. Durante "Le Tour de Schottegat 2016 na Corsou na maart ultimo, Joshua a gana diferente premio y a bira

"overall winner" den e categoria di 12 pa 13 aña. Na juli proximo e lo participa na e "Georgia Cycling Grand Prix 2016", un torneo internacional na Georgia.

Comision Copa Hubenil Gobernador Felipe B. Tromp ta felicita tur e ganadoranan y ta invita nan y nan famia pa asisti na e ceremonia diaran-son 27 di april, Dia di Rey, den Wilhelmina Park no mas laat cu 8.15 di mainta.

